

Pindahkan industri intensif buruh ke Indonesia kurangkan masalah pendatang

Um- 14/12/2004. 2

JAKARTA 13 Dis. — Bekas Perdana Menteri, Tun Dr. Mahathir Mohamad hari ini menyarankan agar Malaysia memindahkan industri-industri intensif buruh ke Indonesia bagi mengurangkan masalah dengan pendatang tanpa izin Indonesia.

“Adalah lebih baik jika Malaysia memindahkan sesetengah sektor perniagaannya yang banyak menggunakan tenaga buruh ke Indonesia,” kata Mahathir kepada wartawan di sini selepas menemui Presiden Indonesia, Susilo Bambang Yudhoyono.

Beliau berkata, pemindahan operasi syarikat ke Indonesia akan membantu Malaysia membendung masuknya pendatang tanpa izin Indonesia memandangkan mereka akan mendapat pekerjaan di tanah air sendiri.

Malaysia minggu lepas melanjutkan tempoh pengampunan untuk pendatang tanpa izin pulang ke tanah air mereka sehingga akhir bulan ini.

Sebelum itu, pendatang diberi tempoh sehingga pertengahan November untuk pulang ke negara asal tetapi tidak ramai yang mengambil kesempatan daripada tawaran pengampunan tersebut.

Mahathir menyatakan, perbincangan beliau dengan Susilo banyak tertumpu kepada pilihan raya Presiden Indonesia baru-baru ini yang beliau sifatkan sebagai berjalan dengan aman dan lancar. — AFP.



SUSILO Bambang Yudhoyono bersalaman dengan Tun Dr. Mahathir Mohamad pada pertemuan di Jakarta, semalam.